

МАЖАР ҒАЛЫМДАРЫ ТҮРКОЛОГИЯ ҒЫЛЫМИ-ЗЕРТТЕУ ИНСТИТУТЫНЫҢ ҚОЛЖАЗБАЛАР ҚОРЫМЕН ТАНЫСЫП, ҚЫЗЫҒУШЫЛЫҚ ТАНЫТТЫ

Университетімізге келген мажар ғалымы, профессор Сандор Папп пен Сегед университетінің халықаралық және қоғаммен байланыс жөніндегі вице-ректоры, профессор Петер Закар Түркология ғылыми-зерттеу институтының ғалымдарымен кездесті.

Кездесу барысында институттың ғылыми бағыттары жайында сұхбаттасып, қолжазбалар қорымен танысты. Түркология институтының архив материалдарын көріп, араб, парсы, шағатай тіліндегі көне жазбалар мен литографиялық кітаптарға қызығушылық танытты. Венгрия ғылым академиясында доктор атанып, Сегед университетінің ежелгі, ортағасырлық және жаңа венгр тарихы кафедрасында қызмет атқарған ғалым



Сандор Папп өзінің Шығыс халықтарының тарихы бойынша зерттеу жүргізіп жүргенін және Түркология институтының қолжазбалар қоры бойынша байланысып, алдағы уақытта бірлесіп жұмыс атқарғысы келетінін жеткізді.

Кездесу соңында Түркология ғылыми-зерттеу институтының директоры, профессор Булент Байрам мажар ғалымдары Сандор Папп пен Петер Закар мырзаларға университет және институт ғалымдары атынан алғыс білдіріп, алдағы уақытта ғылыми байланыстарын жалғастыратынын жеткізді.

Роза ЕСБАЛАЕВА
Түркология ғылыми-зерттеу институтының ғылыми қызметкері

БӨРЕКЕЛДІ!

ШӘКІРТТЕР ЕРЛЕП ТҰР!

Ахмет Ясауи университеті журналистика бөлімінің түлектері Түркістан топырағында текке оқымағандарын бірінен соң бірі дәлелдеуде.



Жуырда ғана ақын Батырхан Сәрсенхан "Дарын" мемлекеттік жастар сыйлығына ие болып бір қуантса, бүгін тағы бір түлегіміз Шұғайып Сезімхан Қостанайда өткен аламан айтыста бас жүлде алып, темір тұлпар мінді! Дәнді өлкеде Тәуелсіздіктің 30 жылдығы мен Ы.Алтынсариннің 180

жылдығына орай ұйымдастырылған «Тәуелсіздік, елімнің тұмарысың!» атты республикалық ақындар айтысында айтыстың бас жүлдесін Шұғайып Сезімхан еншіледі. Жеңімпазға жергілікті зауытта құрастырылған Chevrolet Nexia көлігін тақымға басты. Жарайсындар,



яссауиліктер!
P.S.: Екі күн бойы көне шаһардың кішкентай мультитқұмарларына үлкен анимациялық кинофестиваль сыйлаған Сандуғаш Баймаханқызының да біздің түлек екенін мақтанышпен айтып қояйыншы...

Бекжігіт Сердәлінің Фейз-бук парақшасынан

СПОРТШЫМЫЗ ӘЛЕМ ЧЕМПИОНАТЫНЫҢ КҮМІС ЖҮЛДЕГЕРІ

Университетіміздің студенті Әбілтаева Назерке әйелдер арасындағы белбеу күресінен Әлем чемпионатының күміс жүлдегері атанды.

Белбеу күресінен әйелдер мен ерлер арасында Әлем чемпионаты 26-29 қазан аралығында Татарстан Республикасының Қазан қаласында өтті.

Байрақты бәсекеде студентіміз Әбілтаева Назерке күміс жүлде иеленді. Спортшы 52 салмақ дәрежесінде бақ сынады.

Жаттықтырушысы – Қазақстан Республикасына еңбек сіңірген жаттықтырушы Абдісадық Халиллаев.



OPEN AIR - АШЫҚ АСПАН АСТЫНДАҒЫ КЕШ !

Мен Түркістан облысындағы Қожа Ахмет Ясауи атындағы Халықаралық қазақ-түрік университетінің «Журналистика және репортер ісі» мамандығы бойынша білім алып жатырмын. Биыл университетімізде алғаш рет ашық аспан астындағы студенттер кеші өтті. Бұл кеште жалындаған жастардың басым көпшілігі бой көрсетті. Жалпы маған кештің идеясы қатты ұнады. Көптеген студенттеріміз тек сабақ оқып қана қоймай, өз кештерін керемет әрі қызықты өткізді. Бағдарламада арқан тартыс, қол күрес секілді қазағымыздың керемет ойындары орындалды. Сонымен қатар Open Air-де Сүлейман сұлтан, Джокер, Ханшайым секілді аниматорлар да көрермендерді қызықтыра түсті. Жастардың өз күшімен ұйымдастырған кешінде барлық әндер жанды дауыста орындалды. Әсіресе, университетіміздің студенттері Бақдаулет Жолдасбек, Ердан Раймир, Бақдаулет Ерланұлы және Lee 23 секілді жастарымыздың әртүрлі тақырыпта орындаған әндері, тыңдармандармен ашық араласып, жұмыс жасай білуі ерекше таң қалдырды. Ал, маған ең қатты ұнағаны ұйымдастырушылардың қайырымдылық жасауды ұмытпағандары. Қанша жерден тек көңіл көтеру кеші дегенімізбен, жақсылықты да қатар алып жүрді. Жастарымыз жәрмеңке ұйымдастырып, әртүрлі сусындар, тоқаштар сатып, түскен қаржыны қайырымдылыққа жұмсайтын болады.

Ашық аспан астындағы естен кетпес күнге университетіміздің ректоры Жанар Темірбекова өз жылы лебізін білдіріп, карантиннің аяқталуымен құттықтап, студенттерге алдағы уақыттағы оқуларына сәттілік тіледі!

Аружан БАРЛЫБАЙ
1 курс студенті